



**2018-mut aningaasanut inatsisissatut siunnersuut.**

(Aningaasaqarnermut Akileraartarnermullu Naalakkersuisoq )

(Pingajussaaneerpeqarnera)

Demokraatini manna aningaasanut inatsisissaq pillugu Aningaasaqarnermut Akileraartarnermullu Naalakkersuisoq ataatsimeeqatigeqattaarparput isumaqatigiinniaqatigeqattaarlugulu. Kissaatigut piumasaaqatigullu qallorpagut ajoraluartumilli paasivarput Aningaasaqarnermut Akileraartarnermullu Naalakkersuisoq allatorluinnaq pingaarnersiuerusussuseqarsimasoq. Kissaatitta arlaannaalluunniit tusaaneqanngilaq.

Soorunami tamanna uggoraarput. Sunniuteqarusukkaluaratta aamma isumaqaratta Aningaasaqarnermut Akileraartarnermullu Naalakkersuisup naalakkersuisoqatigiillu angusaat inuiaqatigiinnut akorngutaasussaasut. Tamanna uterfigeqqissavara.

Taamaakkaluartorli Aningaasanut Inatsisissaq pitsaasortaqaarpoq. Isumaqaarpugut pitsaasoq timersornermut aningaasat amerlanerusut illuartinneqarneri. Amerlaneroqqugaluarpagut. Isumaqaarpugut angajoqqaarsiat ajunngitsorsiaasa qaffangaatsiarnerat pitsaasuusoq. Aamma iluarisimaarparput najugaq qimanngu perorsaasunnigorniarnerit inunnillu isumaginninnermut siunnersortinngorniarnerit nukittorsarneqarnerat pitsaasuusoq.

Naatsorsuutigarpullu aperisoqassaqaartoq sooq taava isumaqarnerunga manna Aningaasanut Inatsit toqqaannartumik inuiaqatigiinnut akorngusiissasoq. Akissavara.

Nunarput massakkorpiaq aningaasarsiornikkut ingerlalluarpoq. Suliffissat amerliartorput. Aamma avammut tunisassiarisartakkatta pingaarnert raajat qalerallillu nunarsuarmi akii qaffasipput. Allatut oqaatigalugu ingerlalluarput. Taamatut pisoqartillugu ileqqaartassaagut aningaasaliinissarpullu isumagalugu aamma pissaqarumalluta aningaasarsiorneq killormut saappat. Arlaannimi taamaaliumaarpoq.

Suliffeqarfiit patajaallisarnissaannut aningaasaliisimasariaqaraluarparput pisortallu allaffissornerat angeqisoq pisariillisaavigisimasariaqaraluarparput. Periarfissaq atorsimassagaluarparput ingerlatsinermut aningaasartuutigut appartinniarlugit. Aamma Aningaasanut Inatsit sanasimasariaqaraluarparput sinneqartooruteqartussanngorlugu.

Aningaasaqarnermut Akileraartarnermullu Naalakkersuisoq killormut iliorput. Ingerlatseqatigiiffiit akileraarutaannik appaanngilaq imaluunniit nunaqavissut suliffiutaasa patajaallisarnissaat



anguniarlugu sunnguamilluunniit iliuuseqanngilaq. Pisortat allaffissornerat pisariillisaaviginngilaa. Ingerlatsinermut aningaasartuutunik ikilisaanngilaq. Aningaasanullu inatsisiliorput suamik suamik sinneqartoorutilimmik aatsaallu piviusunngortinneqartussanngortumik, pingaarnersuisinnaassuseqannginnini pissutigalugu akiligassaq aalisartunut nassiunnikummagu.

Taakku akitsuutunik qaffaanerit sualummik raajanut qalerallinnullu akisunaarujussuarneqariaannaapput, aalisartummi atungaat ajorseriartinneqartussaammata. Akisoorujussuanngoriaannaavoq nunatta avammut tunisassiortuisa atugaasa taamatut ajorseriartinneqarneri.

Ataatsimut isigalugu Aningaasaqarnermut Akileraartarnermullu Naalakkersuisup raajanut qalerallinnullu akitsuutunik qaffaanermigut pissarsiariniarpai 85,7 millioner koruunit. Eqqarsaatigilaariartigu Aningaasanut Inatsit qanoq isikkoqarsimassagaluarnerseq pineqartunut akitsuutit qaffanneqarsimanngikkaluarpata? Amingartooruteqarujussuarsimassagaluarpoq.

Tamatuma ajoraluartumik takutippaa Aningaasaqarnermut Akileraartarnermullu Naalakkersuisup naalakkersuisoqataasullu IA, Partii Naleraq Siumullu ataaseq assigiissutigigaat; pingaarnersuisinnaassuseqannginneq aamma akisussaassusilimmik aningaasanut politikkimik ingerlatsisinnaassuseqannginneq. Partiit taakku pingasut politikkiata kingunerissavaa qaqugorsuarmulluunniit aningaasarsiornikkut namminiilivikkunngitsugut kiisalu ukiorpassuarni Danmarkimit bloktilskuddit isumalluutigisariaqassagigut. Tamannarpiaanerluni kissaatigisarsi? Allatorluinnarmi oqaluttaraluarpusi nilliaatigileraangassiuk Kalaallit Nunaat allanngortinneqarsinnaanngitsumik namminiivikkiartorpoq.

Immaqa allanngortittariaqaraluarparsi Kalaallit Nunaat allanngortinneqarsinnaanngitsumik namminiilivikkiartortoq pitsunngussasorlu.

Nalunngilara ileqimisaartorumaartusi nakeriallallusilu, nassuiaarujussuarlusilu aalisarneq, aatsitassarsiorneq takornariaqarnerlu aningaasanik amerlanerusunik aallerfigiinnariaasut aamma tamanna tusarniarsuttorujuuvoq. Kisianni eqqunngilaq; Aningaasanimmi amerlanerusunik pisasi nassaarfiginikuunngilasi. Paarlattuanik aningaasanut inatsit assersuutaalluannaarpoq nutaanik akitsuusersuinissigut aalisartut atungaannik aserortersisi.

Aamma arlaannassiluunniit maannamut akisinnaanngilaat qanoq iliorlusi ukiumut 5 milliarder koruunit pissarsiariniarnerisi pisariaqarmammi taakku pissarsiarinissaat aningaasarsiornikkut nammineq napatilissagutta.

Oqaatiginerparalu massakkorpiaq Kalaallit Nunaat ingerlalluartoq angisuumik siuariartoratta, suliffissat amerliartormata aamma aalisakkat qaleruallillu nunarsuarmi akigissaarmata? Oqaatigeriinguatsiarpara. Taamaakkaluartoq suulluunniit ataqatigiisissinnaanngilasi. Tamanna tupinnaqaaq.



Malunnarpoq Naalakkersuisut sapiissuseqarpasinngitsut, piomassuseqarpasinngitsut aamma pikkorissuseqanngitsut inuiaqatigiit aningaasartuutaannik pingaarnersiunissaminnut aamma takorluuisoqarsinnaanngilarluunniit qanoq iliorluni isertitat amerlisarneqarsinnaanersut. Taamaattumik iluaqusiinngivippoq suleqatigiittoqarsinnaarpasinngimmat oqaloqatigiittoqarsinnaarpasiganilu Naalakkersuisut akornanni.

Taamaattumik takuarput Naalakkersuisup ilisimarpasinngilaa Naalakkersuisoqatini alla sunersoq. Atagu quinaaluttumik assersuusiulaariarlanga.

Ukiaq tamaat tusaavarput Peqqissutsimut Naalakkersuisup imigassamut inatsisiliaminik piviusunnngortitsiniarsarisoq. Inatsisip inerteqquterpaaluit atorlugit imerunnaamisinniarsariarpaatigut. Inatsit naalakkersuisoqatigiinnit akuerineqarluni atuutilerpoq, aningaasanut inatsisissaq assigalugu. Taava isumaqaqqajaanassagaluarpoq Naalakkersuisut upperissagaat siunertaq naapertorlugu inatsit sunnuteqarumaartoq imernikinnerulersillutalu. Minnerusumik imigassartulissagutta taava soorunami imigassarsiarisartakkagut millisittariaqassavagut.

Taamaakkaluartoq Naalakkersuisut missingersuusiorpaat imigassamut akitsuutitigut isertitagut amerlissasut. Eqqortumik oqaatigalugu imigassamut akitsuutitigut 2018-mi 195 millioner koruunit isertinneqarumaartut tagginneqarpoq. 2017-mi missingersuutigineqarpoq 190 millioner koruunit isertinneqassasut. 2016-mi taakkunatigut isertinneqarput 193,6 millioner koruunit. Illuatungaani imigassamut inatsisiliorpoq sakkortuumik killilersuingaatsiartumillu, imernikinnerulernitsinnik kinguneqartussamik aappaatillu missingersuutigineqarpoq imigassamut akitsuut iluanaarutiginerussagigut. Ataqatigiinngillunnaqqissaarput.

Taamaakkaluartoq qilanaarpunga Peqqissutsimut Naalakkersuisup kiisalu Aningaasaqarnermut Akileraartarnermullu Naalakkersuisup uannut akissuteqarnissaannut? Aamma ajornanngippat inimi maani ullumi. Isumaqatigiissutigisinnaappassulli sorleq akissuteqassanersoq aamma akisussaq qanoq akissanersoq. Kisianni ajortoqarpoq arlaanni.

Oqareernittullu; manna aningaasanut inatsisissaq Kalaallit Nunaannut toqqaannartumik akornngusiissaaq aamma taamaattumik Demokraatini soorunami naaggaassavarput.

2018-mut Aningaasanut Inatsisissamut siunnersuutip itigartinneqarnissaa matumuuna inassutigaarput.